

**Zeitschrift:** Annalas da la Societad Retorumantscha

**Herausgeber:** Societad Retorumantscha

**Band:** 96 (1983)

**Artikel:** Mulins e rodas - mulin ella Cadi : emprova da sclarir igl origin e destin dils indrezs cun roda d'aua : (secunda part)

**Autor:** Tomaschett, Paul / Deflorin, Tobias

**DOI:** <https://doi.org/10.5169/seals-234626>

### **Nutzungsbedingungen**

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

### **Conditions d'utilisation**

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

### **Terms of use**

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 18.04.2026

**ETH-Bibliothek Zürich, E-Periodica, <https://www.e-periodica.ch>**

# Mulins e rodas – mulin ella Cadi

Emprova da sclarir igl origin  
e destin dils indrezs cun roda d'aua

da Paul Tomaschett e Tobias Deflorin

(secunda part)

6. *Alla tscherca dils indrezs cun roda d'aua en Sur- e Sutsassiala*

Igl ei neras uras da sefar si per investigar ils vegls mulins dalla Cadi. Tgi ch'enquera tals baghetgs, quels ch'ei restai u ch'ei svani, sto serender sper dutgs ed uals. Mintgin sa denton che nies ambient ha midau fetg sia urdadira enteifer ils davos 50 onns. Mo darar «gl'ual tschalatta ch'ins auda l'aua lunsch entuorn», sco quei ch'il docter Aluis Tuor da Rabius ha scret en ina da sias poesias.

S'entelli ch'ei setracta buca mo dad ir suenter ils fastitgs da mulins. Jeu sesprovel biaronz da clamar en memoria ils falluns, las fravgias, las resgias ed auters menaschis dotai dalla famosa roda d'aua. L'aua ha siu dretg engiu, e quei buca mo tenor in vegl proverbi giuridic romontsch. Igl ei pia clar ed evident d'entscheiver il viadi d'exploraziun al pei dil Crispalt. Cumpignei pia mei en crusch e traviers per vals e valettas entochen Tavanasa.

*Tujetsch*

*Tschamut*

Ils avdents «dadains gl'uaut» ein mai stai pupergnai cun èrs da garnezi. Las uclivas situadas cheu denter 1500 e 1800 meters sur mar segidavan culs chischners, quels famus madiraders da graun. Igl ei per nus carstgauns disai culs centers da cumpra insumma buca pusseivel da s'imaginar tgei stentas e fadigias ei duvrava en quels loghens selvadis per nutrir e vestgir ils ses cun dil siu. Ed ils habitonts eran inagada dètg numerus. Anno 1768 dumbrava Tschamut 67 olmas e Selva schizun 95.

Ils Tschamuters havevan tschentau lur mulins dadens l'ucliva agl ur dalla via veglia dil Cuolm d'Ursera. Els partevan senza dubi ils indrezs culs vischins da Surpalits, schiditg che quell'ucliva isolada ei stada habitada secapescha. Il Rein dalla Val Val haveva flad e forza d'avonz per mover las rodas da quels emprems mulins sisum la Cadi. Sin in maletg da 1817 muossa il pictur turitges Johann Ludwig Bleuler cun tratgs marcants las cascadas dil dargun ed ina mudesta tegia-mulin a garnugl el fiep sut ina preit crap.

Il num Prau Mulins silla riva seniastra dil Rein da Tuma cumprova aunc oz quei ch'ei stau inaga agl ur dil funs che stauscha viers il torrent dalla Val Val: mulins e matei era in fallun. Igl expert po aunc oz veser dadens l'aua las restonzas d'in dutg. L'ucliva da Surpalits ei svanida avon tschantaners, la nauscha lavina da 1809 ha derschiu treis, quater clavaus



Tagl ord la gravura da Bleuler e Falkeisen: «Vue de la jonction des deux sources du Rhin antérieur, celui du Mont Badus et du Crispalt, prise près de Chiamut». Il paesagist Johann Ludwig Bleuler ei staus anno 1817 en Tujetsch. Siu mulin ault – d'aspect plitost niev – pudess esser il successur dil mulin bass staus pli da vegl da l'otra vart da l'aua, medemamein sut in grep. Pader Placi a Spescha ha fatg stem da quel «che stetti leu da vegl enneu», mond ina damaun d'uost 1785 sil Badus cul decan Fintan Birchler dalla claustra da Rheinau.


da Prau Mulins e probabel era ils indrezs hydraulics sper il dutg numnau. Il mulin sut il grep dado l'aua ha perencunter teniu petg aunc in pulit toc viaden el 19avel tschentaner. Mo cura che quel ei ius da rendiu eran la cultura da garnezi e da mulins gia fetg periclitadas. Il stradun dall'Alpsu ha lubiu da menar la muliziun a Rueras.

### *Selva*

Strusch ein ils dus Reins da Tuma e Curnera reuni, ch'els fan amogna lur auas als mulins da Selva. Al pei dil vitget, giu Plaun da Punt, existeva in mulinet cun roda bassa. In liung pluschein tschaffava l'aua en sut il Basto e targeva ella sil mulin. Ils Heleners – aschia numnavan ei ils Pederers – han fatg ils muliners sil pli pauc 100 onns. A Gion Martin Peder, naschius 1793, ein suandai Giachen, Toni, in secund Gion Martin ed auters. Il mulin ei ius en cul davos tschentaner. In tschuppel onns eisi stau faners sillas restonzas da mir; mo in unviern da nevas han las lavinas sfraccau ils clavazeuls per adina. La mola-surain plazzada en in iert da flurs a Sedrun-Gonda ei ina dallas paucas memorias restadas dil vegl mulin da Plaun da Punt.

In secund mulin sesanflava vi da tschei maun dil Rein, vi Sur Rain a pèr cun in fallun. Ina gravura en itschal dils 1840 mantegn la cumparsa da quels baghetgs schumellins e dil mulin da Plaun da Punt da l'otra vart dall'aua. Tuts treis paran vegls. Tschentai giusut il vitg pon els esser mitschai levamein dil nausch incendi dils 15 d'october 1785. Cun lur sempla construcziun cubica fatga da lenna rodonda semeglian els fetg ils clavauets els praus sul piogn dil Rein.

Ils dus casetgs, stai cheu schiditg da cuminonza, ein da considerar pils davos da lur gener dadens gl'uaul. Igl'emprem ensiviars, alla fin bravamein sgurdinaus, era in fallun. Giachen Antoni Deflorin ei staus siu davos possessur. Omisdus baghetgs havevan ina roda zanistrera. Ina ristaina da 200 meters indichescha aunc oz il dutg-mulin che sederscheva el Rein immediat suenter ils sigliots sur las rodas. Ils vegls da Selva seregordan aunc che lur tats e tattas purtavan graun da moler vi Sur Rain. Giusep Antoni Lorez (1845–1924), maridaus cun ina Tudestga dalla Baviera e staus ell'America, ha fatg ina partida onns il muliner. Il davos possessur e muliner senumna Vigeli Venzin. Giusep Giger, siu schiender, e frars han bess giu il mulin ils 1927 circa e duvrau la lenna per baghegiar in faner da tschella vart da l'aua. Il viandont che banduna oz il stradun e serenda a Selva po admirar las duas molas avon l'emprema



Selva. Mulin e fallun vi Sur Rain, omisdus cun roda zanistrera. Fotografia prida neu digl ur dil Rein viers il sid, entuorn ils 1910. Hermann Weickel, Turitg.

casa. – Entuorn ils 1940 ha Vigeli Venzin baghegiu in mulin pli modern giudem il vitg; mo il terribel incendi dils 11 da zercladur 1949 ha buca schanegiau el.


### *Mulinatsch*

era inaga forsa la pli veglia dallas numerusas uclivas che Tujetsch ha piars enteifer ils tschantaners. Tgi ch'enquera ella oz, anfla mises silla spunda sid dalla Val Giuv rodund 1700 meters sur mar. Ils mulinets da Mulinatsch e Mulinatsch Sut – sapocu els ein svani – survevan als vischins da Caspaua, a quels da Planatsch, da Scangleras ella foppa schurmegiada sut Planatsch, da Giuv (che dumbra anno 1768 buca meins che tschun casadas cun 22 persunas), da Nurschei e probabel era da Clavadi situaus empau pli a bass. Pils habitonts da quels loghens magari exponi era ei daveras pli segir e cumadeivel da posseder agens mulins e fallun ella vischinonza che da descender en tuttas auras a Rueras. Ins astga puntuar en quei connex ch'ils purs dil temps vegl purtavan il graun si dies en bulschas e sacs u brentas-lenn ni bardigliavan el sin sliusas a mulin.

## *Rueras*

Quei vitg ha midau fetg plaz ed aspect enteifer ils tschentanners. Inagada steva el propi sillas rivas dalla Val Milà. Las casas e clavaus sisum stevan si Candentschuns, debia baghetgs s'extendevan sur e sut la Giassa, sco ins numnava e numna aunc oz la via vedra. Ina tschécca part dil vitg tunscheva da Suloms oragiu entochen giuls Trutgs. El 18avel tschentanner dumbrava Rueras varga 200 habitonts, pia in bien ton dapli che Sedrun. Ils avdonts vivevan el segir, silmeins aschiditg ch'ils uauls dalla Val Pulanera e dalla Val Milar (plaid e senn adual a Milà) havevan pégn d'untgida avunda per tuttas nevadas. Mo dapi ch'els ein vegni dil meins, eisi stau ina resca da viver maneivel da l'aua da Milà.

Las catastofas han buca fatg spetgar. En sia descripziun dalla Val Tujetsch rapporta pader Placi a Spescha dallas pli sgarscheivlas, quella da 1749 e da 1817 che han purtau mort e malura a bia glied ed animals, casas e clavaus. Scadina ha scuau giu Rein tschun mulins, in fallun ed ina resgia. In reporter dalla secunda numna ils proprietaris da quater baghetgs: il mulin dil Dumeni, il mulin da Giachen Schmed, quel dil Bisquolm ed il fallun dils Cavegn. Il vitg sez ei vegnius dislocaus plaun a



Unviern a Rueras. Canals, mulin e scrinaria dils Giossis. La roda dalla scrinaria ei bein veseivla sut la suosta. La rasena lenna sut la punt indichescha la resgia. Ediziun Photoglob, Turitg.

plaun encunter damaun, ferton ch'ils indrezs d'aua reconstrui han stuiu esser vinavon marschei digl ual. Glied setratga neutier ha meinsvart cattau in suddetg vi Suloms. Pils menaschis ch'ins ha turnau a baghegiar 1818 e suenter ein ins serestrenschius sin la riva seniastra dalla val; mo la cascharia ed il tschaler da caschiel schain sin la costa dretga sut la Giassa. Plirs nums ein aunc semanteni ella memoria da certas persunas cudischidas culla veta mistergnera da tschels onns: ils mulins dallas Venzinas (da Cristian Josef Venzin, mistral 1818–20) ual sut la resgia, il mulin dils Gion Flurins (dall'era da Gion Rest Riedi), il mulin dils Mugglis ed il muliner Gion Giachen Berther, naschius 1799. Nuota da far curvien che molas relaschadas pusavan avon decennis aunc tscheu e leu sillas rivas dalla Val Milà. Quella dil mulin dils Gion Flurins survescha dapi 1979 da plat-meisa silla piazza da giug vi Plaun da Pors.

Igl ei cheu il bien mument da far la revista dils menaschis e mistergners dallas davosas generaziuns. La gronda part dils baghetgs ein manteni, aschia ch'igl ei buca grev da s'orientar. Dapi la construcziun dil stradun ei l'aua passada tras in tunnel sut la punt ora. Enviada sillas canals, menava ella la roda-mulin dils Gioassis. Il mulin vegl po esser staus proprietad da scarvon da cumin Rest Luregn Lucas Cavegn. Il mars 1799, cura che las truppas franzosas ein s'avanzadas neu sul Cuolm d'Ursera, era Bibian Gioissi muliner a Rueras. (Bibian para d'esser il surnum; ins sa s'imaginar ch'el deriva dalla mumma Bibiana Gioissi-Giger da Sedrun.)

Havend fitgau pei cheu han ils Gioassis, numnai semplamein ils muliners, sviluppau ina gronda activitad sper l'aua da Milà. Sep Antoni Gioissi-Monn (1840–1915) fageva muliner, «pec», resgiader ed aunc bia auter. El mava sez casa per casa pil graun e purtava la frina anavos allas masseras. El duei haver baghegiav la stiva da paun, ina casetta bassa da mir partida en local per struclar ieli semglin e fuorn. Cheu fageva el il furner, vul dir scaldava il fuorn e metteva en sez ils pauns che las puras purtavan. Ei tuccava allura ad el in paun sin ina furnada da 30. Ina fotografia digl atelier Lang da Cuera, undrada 1913 cun la medaglia d'aur, ha reteniu oreifer la venerabla urdadira dil vegl muliner surprius dil fotograf avon igl esch da sia stiva da paun.

Quater muliners da sia schlatta han priu la successiun: siu fegl Gion Antoni (1880–1953), Duri Battesta, Sep Antoni e Gion Battesta. Ils 1970 circa han ins calau da moler. Igl indrez, aunc en bien stan, ei vegnius vendius ordeifer. – Frina, paun ed ieli semglin eran uni stretgamein in cun

l'auto. El baghetg-mulin era endrizzau ina pella cun treis pisuns per far frina e pasta semglin.

Sut il mulin, ualti datier dalla punt veglia, stava la scrivania. Sia roda aulta sut la suosta era cun ses varga treis meters e 50 diameter per la letga pli gronda che quella dil mulin sisura. Cheu ha Christian Giachen (1878–1951, fegl da Sep Antoni muliner) trafficau sia veta ora. Il Crest Giachen, sco el vegneva numnaus, haveva in dun tut aparti per indrezs mechanics. El e ses frars han baghegiau respectiv refatg la resgia, mulins, cundrezs da pisar, casas, nuegls e clavaus. Il fegl Gion Antoni ed ils biadis cun lur fatschenta flurenta ein i la medema via, secapescha tenend petg culla moderna.

L'aua era strusch dada giu dalla roda dil luvratori ch'ella vegneva menada sut la punt ora en direzziun dalla resgia. Il baghetg vegl eregius suenter la catastrofa da 1817 ei staus biars onns els mauns dalla famiglia Gieriet, da Hans Giachen (mistràl 1826–28), in um ch'ei sestentaus fetg per l'erezziun dallas uestonzas encunter la lavina. Pli tard ein Sep Berther da Dieni, Schmeds (ils schinumnai Stens), Cavegns, Giossis ed auters stai acziunaris dalla resgia. Il scrivani Crest Giachen Giossi ha fatg ditg il resgiader en sia resgia nova, sustenius da divers commembers dalla famiglia avon e suenter. Che las canals sut la punt havevan tut speciala tila per la buobanaglia san ins s'imaginar. Ei capitava ch'ils pli gagliards targevan neu il barcun, vul dir bettevan giu l'aua. L'aretga fermada dalla roda sustentava neuadora il resgiader ch'encureva denton adumbatten la bargada sbrigada davos las cantunadas.

Giusut il vitg, giun Trutgs sco ins scheva, stava in casetg brinatsch senza finiastras, apparentamein starschaut, il fallun dils Giossis. Il muliner Sep Antoni duei haver eregiu el cheu sil sulom digl anteriur mulin dallas Venzinas. Cura ch'ei vegneva october giavinavan las palas l'aua silla roda zanzistrera. Allora deva ei veta el fallun; ils treis pisuns sesalzavan per batter las monas glin purtadas neutier da mummas e mattas. Era cheu tucava ei da salidar il muliner Giossi che retschaveva sin diesch poppas glin ina poppa per manischar e mantener il fallun.

Ils remarcabels baghetgs dalla veglia cultura purila existan buca pli. Il cundrez dil fallun, staus il davos proprietad dils cusrins Sep Antoni e Sigisbert Giossi, ei ius entuorn ils 1950 a Trun el Museum sursilvan nua ch'ei fuss aunc da cumpletar el. Mender stat ei culla sort dil mulin, dalla stiva da paun e digl indrez da far o ieli. Deplorablamein han ins schau ir

empaglia bia utensils e tocca representativa che fagessen honor e buna para el museum local tuatschin.

Il mulin vegl ha teniu stendiu entochen alla fin dalla davosa uiara. Spussaus bravamein ha el allura stuiu untgir ad in mulin niev muentaus da forza electrica. Las parts duvreivlas han anflau suttetg e diever ad Alvagni. Entuorn ils 1949/50 ha inschignier Albert Lutz a Cuera acquistau las duas molas-mulin isadas sil peter pir, quella suren sco plat da meisa per siu curtin e l'otra per siu vischin. Quei fuss silmeins in'informaziun concernent las rudialas da granit che han fatg vetas da glieud frina da paun e cuschina.

Ina brischeria da vinars d'ansauna, situada in tschancunet sut il fallun e stada tschentada sil sulom d'in vegl mulin, concludeva la fila da baghetgs sillas rivas dalla Val Milà. Hans Giachen Monn-Deflorin e siu fegl Giachen Antoni han barschau cheu onns ora vinars cugl indrez cumpraus da Leci Balzart da Cavorgia. Mo l'ordinaziun nova d'alcohol ha priu il muis dils brischavinars, e Luis Rensch da Darvella ha cumprau las buots e vanauns. Era Salins possedeve si'atgna destillaria, quella dil Zanetti. Ils fastitgs dalla pli aultsituada breneria dalla val, quella dils Riedis,



Rueras da tschels onns cul fallun da roda zanistrera e canals en bien stan. Senie-ster la resgia. Carta postala da Moriz Maggi, Glion.

fussen denton d'encurir sin 1800 meters sur mar a Plaun Milez sut las stallas dall'alp da Tschamut.

Il scaldar e barschar endrida da sefermar in mument ell'anteriura fravia sper la fontauna amiez il vitg da Rueras. Cheu ha statalter Duri Venzin retschiert in di d'atun 1799 la viseta d'in contingent da cavallaria russa. Ils menaders han sfurzau el d'enferrar lur cavalets alla moda cossaca, vul dir derschi entuorn e teni da sis umens en dies. Gion Fidel Caduff-Riedi (1788–1872) sco era siu feagl ed in nevs havevan lur fravia vi Suloms. Giachen Lurenz Caduff-Giossi (1861–1938) dalla tiarza generaziun, fravi, urer, dentist e leutier aunc cudischius cun in triep auters mistregns, haveva endrizzau el tschaler sut il luvratori da Crest Giachen Giossi ina mola muentada da l'aua, buca per moler mobein per mular uaffens. Cul temps eis el setratgs si sper il stradun e baghegiu leu casa e fravia nova. Victor Berther ha buca mo surpriu la professiun e la Tgesa Fravi da siu aug, mobein era furniu a mi preziasas notizias concernent ils vegls mistregns e mistergners da Tujetsch. Ils vischinadis da

### *Camischolas e Zarcuns*

possedevan bein a mesa via ton per in sco per l'auter in mulin silla riva dretga dil Strem, denter la via dalla staziun e la punt dalla viafier. Il num Prau Mulins ei restaus per perdetga empei dils baghetgs i a smer-scha. Gest sur la bifurcaziun dallas vias stat l'anteriura cascharia communal; mo ella ha da far nuot pli cun latg e caschiel.

Ella tgesa dils Vigeli pigns, la secunda casa dado la caplutta da Camischolas, era installada la fravia da statalter Sep Lorenz Giacumet (1830–1900), enconuschent catschadur, cavacristallas e president da vischnaunca. En vesta dallas lavurs vid il stradun dall'Alpsu (1860–65) ha el baghiau ina fravia sur la punt da Camischolas, giu ella foppa sper la via veglia dil Cuolm d'Ursera. Sia chezer patenta roda d'aua per alzar il marti grond duei haver fatg sensaziun, mo ha nuota propi giu il cuoz giavischau. Silsuenter ein ils Berthers da Camischolas daventai possessurs dalla fravia, quels che han baghiau la via nova entochen tiel schinumnu «Caraun dils Berthers» sur Ursera. Il vonn secloma aunc adina la Fravia; denton stat silla strebla cantunada da ses mirs in ualer che sefutra in quex da fueina e fol, mazza e martials. E dil mulin staus inaga el plaunet sisura san ins zun pauc.

### *Sedrun-Salins*

Tut ils menaschis d'aua da Sedrun stavan silla costa dretga dil Drun; mo quei «dragun» era pil pli memia rabiaus per seschar giavinar sillas rodas-mulin. Lur aua da catsch vegneva tschaffada ella Val Strem. Naven da leu tschuncanava in liung dutg ils praus da Salins. Dil vegl mulinanc ei restau dapi 1980 nuot auter ch'ina risteina, mo vetas da gliud ha il dutg surviu a Salins Sura ed a Salins Sut, duas uclivettas cun casas, clavaus e buntadès. Salins dumbrava 27 habitonts ils anno 1768 e possedeva mulin e fallun. Salins Sura duei haver giu ina veglia fravia. Il num da Salins stat oravontut en connex cun ina veglia scarsinaria. Sche la famiglia Gisler dalla Val da Fier ei stada la fundatura u ha semplamein surpriu la fatschenta, ei grev d'eruir. Avon l'emprema uiara mundiala ha la famiglia Schmedt-Deragisch, avon sesenta a Cuera, acquistau la scarsinaria da Salins. Il bab Sep Antoni (1871-1954), il «vegl da Salins», e ses dus fegls han scarsinau cheu launa, Josef entochen 1947, Benedict aunc varga 20 onns dapli. Ditg ha ina rod'aulta prestau la forza gronda laschond cul temps siu pensum ad ina ferma turbina. Egl iert sur la casa-scarsinaria lain restonzas da mir supponer vegls baghetgs; quels pon esser stai mulin e fallun. Mo in sulet datum survescha d'indezi. Il cudisch da mortoris relata dil buobet Gion Antoni Giacumet negaus 1890 ell'aua sper il fallun da Salins.

### *Sedrun-Gonda*

Il Dutg da Salins flessegiava viers Gonda, ditg libramein e pli tard en bischels, pli u meins parallelmein cul Drun. Sur la casa da Luis Hendry sisum Gionda (quei fuss la pronunzia tuatschina) possedevan plirs vischins in vegl mulin cun rod'aulta e fallun. Cura che la viafier dalla Furca-Alpsu ei vegnida eregida, ein lur dis stai dumbrai. La mola gronda, ina peisa crap, ruaussa agl ur d'in curtin, paucs meters naven dil binari.


El raiun dalla punt da Sedrun han ils Solivas praticau quei ch'ins se-regorda divers mistregns cun dun e diligenza. Ins sa persecutar silmeins quater, tschun generaziuns. Giachen Antoni, naschius alla fin dil 18avel tschentaner, ei staus in fravi-artist da num. Ses fegls Vigeli (1816-1881) e Giachen Antoni (1823-1864) ein sedistingui buca meins ella medema professiun. Giachen Antoni Soliva-Monn (fegl dil fravi Vigeli), pur e caluster, ha cumprau ils 6 da december 1902 da Sep Antoni Venzin il mulin a Gonda cun falluns da glin e dad ieli sco era la mesa resgia sut la punt.

L'otra part ei restada vinavon possess da Gion Antoni Monn; sia schlatta ha gudiu pli tard treis quartas da quei mun, ferton che ina quarta ei ida vi als Cavegns (a Giachen Giusep ed il davos a Placi). Pli baul ein las mudestas interpresas sur e sut la punt stadas els mauns da Giachen Antoni Beer da «Mollin»: dad el havevan ils Venzins acquistau anno 1879 il mulin niev, sco el vegn numnaus el contract da cumpra, cun falluns e stiva da paun e cun tuts «vertgs» ch'ei drova leutier inclus la mesadad dalla resgia; tschei miez apparteneva da vegl enneu als Monns. Podà ch'ils frars Martin Felici (1807–1864) e Sep Lorens Schmed (1815–1881) eran stai enzacons decennis ils capomuliners da Sedrun. Cun Chrest Anton Mucli e Giusep Frey, naschi 1795 resp. 1822, pon els haver formau in pulit quartet da muliners.

Morts gia anno 1915, ha Giachen Antoni Soliva-Monn buca saviu far ditg il muliner. Ses fegls, disai da giuven da luvrar, ein s'engaschai bein prest ell'agricultura e mistregn. Giachen Antoni (1885–1963) stat senza maridar, mo ei duront varga in miez tschentaner ventireivels da luvrar e barhar en sia cara «Tgesa Mulin» vieifer la punt. Cheu mulava el per temps bunamein di e notg el local da vart dretga e fageva denteren o ieli ella pella dasperas. La rod'aulta, plazzada el plaunterren dalla casa, surveva omisdus indrezs. Ella ei ida entochen ils 1930/35, suandada d'ina turbina entochen 1966. Il mulin va aunc, grazia alla forza electrica, mo plitost per smaccar e rumper graun che per far frina. La mola-suten che pusa vi pil mir encunter damaun mantegn per sesezza ils misteris da mulin e muliners.

Bunamein alla metta seschluitava il dutg-mulin sut la via ora e sitava, prompts per novas aventuras, dallas canals dalla resgia giuadora. Quella ei stada onns ed onns la domena da Duri Vigeli Soliva-Beer. In dessegn d'anno 1897 e fotos d'enturn 1900 muossan buoras rasenadas sur la resgia e plunas aissas entochen o encunter il Drun. Oz vesa la realitad ora auter. La resgia ha fatg plaz al baghetg dil schurmetg civil. Ei drova forsia empau fantasia per sepresentar la resgia da lezzas uras: la vart encunter sera cun canals, sclusadurs e cascadas e la funcziun dallas duas rodas zanistreras. L'emprema (remplazzada ca. anno 12 d'ina turbina) impundeva sias forzas per resgiar, ferton che quella giudem muentava aunc duront l'emprema uiara mundiala ils pisuns d'in fallun pustaus en ina dallas duas suostas che pusavan encunter la preit sut dalla resgia.

Ei descha da perseguitar il destin dil fallun. Ils anno 18 u 19 han ils Solivas translocau e reconstruiu el in tschancun plinengiu sper il vau dil



La resgia da Sedrun stada possess da Sep Antoni Venzin, dils Monns e dils Solivas: in indrez cun duas rodas zanistreras, la gronda per la resgia (strusch veseivla el funs dall'emprema cascada) e l'otra giusut pil fallun baghegiaus vitier ella cantunada sidvest dalla resgia. Dessegn cun rispli 1897 da Johannes Weber (1846–1912) oriunds da Netstal el cantun Glaruna, paesagist e dessignader, plinavon illustrader da diversas ovras, oravontut publicaziuns dalla casa editura Orell Füssli a Turitg.

Drun. Duri Vigeli duvrava ussa il plaz liber per deponer resgem, cutgnas ed auter rufid da lenna. Tenor professor Paul Scheuermeier era quei fallun da treis pisuns aunc en cumpleina forza e funcziun ils anno 1935. Suenter la secunda uiara ei sia stema tschessada tondanavon ch'el ei vegnius trits e scardalius. Vonzei ein umens dil rom vegni, han urentau la tocca duvreivla ed ein sestentai da salvar quei ch'era dign d'in plaz el museum. Il «fallun» construius da Vigeli Berther e ses scolars secundars regorda a liug e lavur da tschentanners vargai.

Il treifegl dils frars Soliva fuss buca cumplets senza il Gion Battista Soliva-Cavegn. El fa 20 onns e varga vitturin e carrotschier. Quei para d'esser stau in'excellenta premissa per arver da Nadal 1934 la pensiun Soliva sil plaz dall'anteriura fravia da Luis Schmed (1863–1954).

Il plaid «fravia» cudezza da dar in sguard anavos. S'entelli che Sedrun ha giu fravis versai ed originals. Gion Bistgaun Beer (1861–1954) ha baghegiau la fravia nova giu sper via suenter ch'el haveva stuiu secuntentar ina partida onns cul tschaler ella casa dalla «Derungsa». Fravi Vigeli Beer, naschius 1777, po esser staus dalla medema schlatta. Ils 26 da mars 1848 ha stalter Crest Valentin Cavegn vendiu sia casa sin cadruvi

inclusiv la fravia suten per dar albiert alla scola. Rodund quater decennis ein ils scolars i cheu en ed ora. Dalla medema schlatteina ein plirs fravis Cavegn stai, il Giachen Lorenz, il Vigeli Giusep ed il Sep Antoni, tuts treis naschi entuorn ils 1830. Ei fa forsa surstar d'endriescher che ina lavina dil december 1808 ha cuvretg ina fravia a Sedrun. Ed in sgol sur treis tschentaners ora lubescha da finir cul Petter Fravij documentaus pigl onn 1500.

En ina vallada cun bia biestga gronda, cauras e selvaschinas deva ei secapescha era tgirs, pials e curom. Avon 200 onns e varga fagevan marcadonts dalla Val San Giacomo el sid dil Spligia in negozi cun pials e tgirs. Lur intschess da commerci tunscheva tochen ella Val Tujetsch. Pil 19avel tschentaner ein dus cuntschapials oriunds da Tschamut bein enconuscents: ils gerbers Gion Bistgaun Deflorin (1827–1900) e siu feagl Michel ch'ei vonzeivi setratgs a Strada sper Glion.

### *Bugnei*

ha conservau entochen oz il num Mulinets per ils funs che tonschan a Rein en fuorma da cugn. Leugiu sper il Drun da Bugnei eran las tegiettas ch'ins astga supponer cun roda bassa, strusch periclitadas dalla lavina. Sper Bugnei cumpigliava lur raiun inagada senza dubi era las veglias uclivettas da Bagliel e Nislas. S'entelli che Sep Antoni Deragisch bab (1815) e feagl havevan buca mo in fuorn per barschar vischala da tiaracotga a Bugnei. Ditg ha igl uler duvrau roda d'aua e molas per moler fin la mischeida d'arschella, da minerals e d'otra materia prima necessaria per far caffetieras, ruogs e scadiolas.

### *Surrein*

il pign vischinadi vieifer Sedrun, dueigi haver fatg pli da vegl diever d'in fallun cun rod'aulta situaus silla pastira giudem il Drun. Mulin ha Surrein denton giu in sigl agen intschess, a Prau Mulins oragiu sut Claus (stau habitau inagada). 1950 era siu sulom denter la senda da Cavorgia ed il Rein da Nalps aunc veseivels. Mo ils 1957–60 eis el vegnius cuvretgs cun material scavaus ord la gallaria Sedrun–Medel dallas ovras electricas Reinanteriur.

Surrein ei sco fatgs per ina scappada enasi Pardatsch. Silla via carabla dad oz ei quei ina trapla. Pli grev eisi da fastisar las caltgeras e falluns, duas veglias explotaziuns daditg serradas ed emblidadas. Alla tscherca da metals han ins avon tschentaners pisau crappa dallas cavas da

Palits, giu sper il Rein da Nalps secapescha e buca silla spunda spuretga dil Tgom nua che l'actuala carta naziunala 1:25 000 (Oberalppass) situescha ils anteriurs falluns.

Ins stuess strusch repeter che la Val Tujetsch ei stada neu e neu reha da minerals e cristallas. Perschuidius da quei fatg ha pader Placi a Spescha deplorau zun fetg ch'in mulin da mular quella crappa preziosa maunchi ella val. Ch'ina tala industria fussi da grond nez e purtassi buna occupaziun ha el scret 1805, il medem onn ch'el ha sviluppau siu plan per in habitadi tuatschin propi segirs da lavinas e bovas. Siu vitg – en nos dis tuttavia buca schi utopics sco inagada –, previus en in rombus da dem Camischolas entochen si Salins, havess era giu da cumpigliar mulins, resgias e fravias d'aua.

### *Cavorgia*

Ils avdonts da Cavorgia e Cavorgia Sura, in'ucliva svanida mo che dumbrava aunc treis fiugs cun 20 persunas ils anno 1768, eran bi leds da posseder in agen mulin e fallun en ina distanza bein contonscheivla. Ils indrezs ein stai da vegl enneu ella Val Gierm sper la veglia via da comunicaziun Tujetsch–Medel–Lucmagn. L'installaziun dalla quala ins se regorda il meglier ei vegnida translocada anno 1885 da Rueras oragiu Maunsut, finfatg per remplazzar in mulin vegnius vegls e caducs. Ludovic Hendry, che ha cumpignau tontas gadas siu bab Giachen Martin (1873–1935) o Mulin, descriva quei «cundrez caussas primitivs che funcziunava adina» en sias enconuschentas «Verduras dalla notg». Igl indrez haveva in inschigneivel sclusaduir, vul dir ina pala-lenn che serrava giu l'aua aschিপrest che la termososa era svidada. La sempla roda bassa cun sias grevas palas cantunusas embratschava il ferm arver vertical che rotava sil plumatsch d'in diraglia crap.

Il fallun da treis pisuns, che teneva cumpignia al mulin o la Val Gierm, denton ver 20 meters sur lez, era endrizzaus per fullar glin e pisar semglin. Il vegl cundrez da struclar o ieli, munius d'in torchel d'agra, ei staus biars onns el pierti dalla casa da scola. Schiditg che la cultura da garnezi e glin ha fluriu havevan bein tuts vischins ils medems dretgs vid mulin, fallun e pella. Las emigraziuns dils 1850–77 – en quels decennis ein pauc meins che 50 persunas idas ell'America – han fatg lartg a Cavorgia. Ils Hendrys ein daventai plaun a plaun ils sulets possessurs dil mulin. Treis generaziuns han dau cavegl cheu per cuntentientscha dil vischinadi: Luis, Giachen Martin ed il davos il Placi che ha teniu la dira en-

tochen anno 54. Mo allura eisi stau finiu cul far frina, ton cun quella da far paun sco cun la tut aparti buna frina da broda da Cavorgia.

Placi Hendry ei setratgs a Sedrun-Gonda ed ha plazzau sur sia casa la mola gronda sco cuzzeivla regurdientscha d'ina cultura morta ora. Il mulin bass da Cavorgia, lein dir sias capoparts, ei ius ils 1962 a Trun e vegnius montaus el Museum sursilvan. Igl ei d'engraziar all'iniziativa da Tobias Deflorin ed alla capientscha dalla famiglia Hendry che quei indrez genuin ei restaus ella Cadi. Il Museum retic a Cuera ei senezegiaus dil transfer ed ha schau far il cumpetent Adolf Gähwiler d'Aschera ina documentaziun detagliada. Ei resta denton aunc in niebel pensum als responsabels dil museum da Trun: dar a quei unic relict dalla cultura mulina il plaz che cunvegn ed aschuntar el medem temps las parts che mauncan.

### *Medel*

#### *Fuorns e contuorn*

han enconuschiu ina liunga tradiziun da mulins e falluns. Dils vegls indrezs da roda d'aua duvrai per las minieras che han schendrau buca pauca sensaziun e tensiun el 14avel secul san ins ton sco nuot. Summedel haveva debia habitonts en in triep uclivas daditg bandunadas. Pardatsch e Sogns Gions, Duscherei e Dentervals eran ina gada tschéc buns lohghens da graun. Mo da lur mulins eisi buca stau pusseivel d'intervegnir zatgei precis.


Per Fuorns encomi ein las enconuschientschas aunc frestgas e bunas. Dretg e seniester dalla Val Puzetta existevan aunc entuorn ils 1900 silmeins in miez tozzel menaschis cun roda d'aua. Els survevan ad Acla, a Fuorns ed ad auters uclauns dil circuit.

Sper la punt dil stradun stat ina casa che ha attratg inagada l'egliada dil viandont ed igl apparat dil fotograf. Cun raschun! Quei baghetg schurmegiaus da vents e lavinas ei staus quei ch'ins seregorda in dils pli bein situai mulins da nossa cuntrada. El pusava pascheivel encunter il grep en cumpignia d'in clavaziel cun nuegl da cauras.

Sia fuorma primara pudess derivar dil 17avel tschentaner, mo la memoria dils vegls tonscha silpli entochen Toni Giger, numnaus Toni punt. El po haver trafficaud cheu all'entschatta dil 19avel. Duront in ed in quart tschentaner ein las famiglias Bearth stadas ferm unidas cul destin da quei mulin, lur casa paterna entochen ils 1890 circa. Las treis davosas generaziuns da muliners ein aunc en regurdonza: Gion Martin

(1818–1887) che ha avdau la casa-mulin, Gion Battista ch'ei naschius leu 1857 e Gion Antoni (1896–1974) che ha mulau entochen quater onns avon sia mort. Ditg ha il muliner Biart, sco ins scheva pil solit, surviu ils vischins da Fuorns ed Acla, pli tard era quels da Pardé e Platta ed ils davos 25 onns ils purs dall'entira Val Medel.

Ei fuss denton falliu da crer ch'il vegl mulin da Fuorns hagi mulau senza interrupziun. Ina dallas pli veglias fotografias, probabel d'avon 1900, fa ver la roda sil schetg en ina rama da lenna rodonda ed ina suosta encunter la preit-sut dalla casa. Ina foto da Meisser, fatga da mesastad 1910, muossa il baghetg bess bravamein a bandun. Sil vial avon casa cre-



Mulin dils Bearths a Fuorns cugl indrez da better giu l'aua, dasperas il clavaziel e sur la via vedra il fallun. Foto Furter, Tavau.

scha pastg, la roda ei senza canals ed il piogn buca praticabels. Tenor in maletg digl uost 1924 perencunter ein il piogn ed il conduct da canals refatgs e l'aua prompta da curdar sillas palas dalla roda gronda.

Entochen 1950 biabein han las canals-mulin menau l'aua dil Rein da Fuorns silla rod'aulta; allura ei l'era dalla tracziun electrica arrivada ed ha purtau levgera per in tschuppel onns, pertgei ils da Summedel mettevan o bia graun. Entuorn ils 1970 ha dr. iur. Adolf von Orelli acquistau il baghetg e midau el en ina casa da vacanzas alla moda veglia. Las installaziuns ein idas senza far gronda canera a Thalwil nua ch'ellas duessen se-presentar in di el museum regional dalla «Resgia veglia».

Dil crest caplutta anora havess ins viu avon decennis treis, quater interessants casetgs silla riva dretga digl ual furibund. Dus stevan sut la via vedra. El fallun cun ina biala roda zanistrera da quater bratschs vegneva ei fullau glin e fatg o giutta. Pauc su suandava in pign baghetg, gia en decadenza ils anno 1910. Quei ei stau inagada in indrez mechanic, probabel il mulinet dallas soras Truaisch, las schinumadas «Mettas da Fuorns».

El prau numnaus Bulettas gest sur il vial sesanflava in vegl mulin cun rod'aulta, propi il tip d'ina casetta da cuolm culla fatscha e cantunadas da mir viers il sid. Sia historia ei varionta. El po datar dils 1874; quei paleisa silmeins sia roda d'empalms che cupida aunc oz encunter in baghetg dall'ucliva da Fuorns. Ils 1930 eis el vegnius transformaus en in fallun. Probabel pudeva il bien mulin dils Bearths ussa satisfar cumpleinamein als basegns da Fuorns e contuorn. Forsa eisi era stau il dretg mument da remplazzar in vegl fallun sut via che era ius en decadenza suenter l'emprema uiara mundiala. Il niev intent ha midau bravamein la cumparsa dadens e dado. Ina preit dad aissas ha remplazzau il mir d'antruras. Era ils proprietaris ein sescumiai enteifer ils onns. A Rest e Martin Fidel Giger ei succedius Sep Truaisch. Sia brit Benedicta Truaisch-Candinas ha saviu raquintar co ei mava da fullar glin e far o ieli alla moda veglia.

Il fallun da Bulettas ei fetg sempels e tipics malgrad ch'ei setracta d'in indrez bravamein tardiv. Sia rod'aulta cun quater bratschs e 20 palas fa dus meters diameter. In arver da tschun meters lunghezia aulza il pisun grond che fuola glin e coniv ed ils dus pisuns pli levvs che smaccan semglin e fan o giutta. La suletta finiastra dat viers miezdi, exactamein oppost ei l'entrada e dretg in torchel per far o ieli.

Ils onns 1970 eisi vegniu critic pil fallun scardaliu. Dunna Benedicta Truaisch ed auters ein s'engaschai per salvar el ella val. Era l'unium da



Il fallun da Sep Truaisch a Fuorns. La canal pusada silla rod'aulta mantegn la parreta. Foto da Paul Caminada, Thalwil.

cura e traffic ei s'interessada pigl object ed ha fatg rugalar il tetg. Ad Adolf Gähwiler d'Aschera ed a dr. H. Brütsch da Winterthur eis ei alla finala reussiu d'acquistar il bi fallunet da Fuorns pil museum da Ballenberg ella Surselva bernesa. L'entschatta november 1978 ei igl entir fallun vegnius demontaus toc per toc e transportaus sur cuolms e vals. Dapi lu stat quei prezius relict dalla cultura purila medelina sigl areal dil museum da Ballenberg allas rivas dil lag da Brienz. Leu sut tschiel aviert vegn el admiraus di per di da numerus visitaders. Siu destin semeglia empau quel da tons e tons emigrants ord tiara romontscha.

In tschancunet sul fallun da Sep Truaisch, mo ualti datier digl ual, stat ina hetta nua ch'ils frars Venzin, oravontut il Gion Giusep (1856–1932), numnaus «il Ventura», e siu feagl Leci (1893–1978) barschavan in excellent vinars d'ansauna, ton pils Medelins sco per biars fideivels clients d'ordeifer. Il menaschi ei serraus dapi 1968/70; schenta dalla detta liunga hagi vonzei engulau broccas e brocs e vanauns.

Silla riva seniastra dil dargun, gest agl ur dalla via vedra, resortevan dus baghetgs che han medemamein piars lur contura e funcziun. In era la cascharia communabla, midada d'in Medelin sesents ordeifer en ina casa

da vacanzas. Pauc plinensi havevan entgins vischins da Summedel construïu ina resgia ils anno 1924. La rod'aulta ha surschau ils 1955 siu pensum alla forza electrica. Surura ha la lavina da Darusas digl avrel 1975 destruïu totalmein quella resgia da muntogna.

Denter Fuorns e Pardé fuss d'encurir in mulinet che ha senza dubi era surviu a Catinauns – smesaus d'ina terribla lavina ils 12 da december 1808 – ed ad auters loghens habitai che existan buca pli. La Plaunca da Mulins dadens S. Roc ei in indezi che basta.

### *Druai e Matergia*

Tgi seregorda aunc dil vegl mulin cun rod'aulta giudem la Val da Druai el schinum nau Plaun d'Uaul allas rivas dil Rein-miez? Biars decennis, gie schizun tschentanners ha el era surviu als vischins da Platta, Baselia e Pardé, fetg da vegl aunc ad in u dus uclauns gualsers ch'existan buca pli. Ursus de Medéll (Carli Giger) che enconuscheva bein il mulin dalla Val da Druai, ha buca per nuot undrau siu inschignus muliner ella risdada culturala «Tagliar seif». Sfatgs d'ina lavina eis el vegnius reconstruïus plinensi sur la via veglia da Matergia nua ch'el stat aunc oz. La gronda part digl indrez plazzaus el local che schai encunter munt deriva dil renomau catschadur, mistergner e cavacristallas Vigeli Pally ni Vigeli dallas Islas sco el vegneva per ordinari numnaus enta Medel. Gion Battista Venzin da Druai ha habitau cheu ella part davontier. Suten era endrizzau ina fravia. S'entelli che Medel ha giu in triep fravias, sper la via veglia ed agl ur dil stradun. Enzacons fravis naschi avon prest tschien onns veglien star sco representants da quei zun undreivel mistregn: Giachen Antoni Giger a Platta, Roc Bundi, Sep Maria Beeli, Sep Martin Beeli e Carli Antoni Pally, tuts a Curaglia.

Pli tard ha Luis Venzin da Druai cumprau il mulin e fatg il muliner. Ils 1977 circa ha Fidel Lutz da Curaglia cumprau il baghetg da Luis Venzin († 1982) e fatg tetg per ch'el mondi buc en decadenza. – Encunter in crest sut la via da Matergia sepusava da pli da vegl in fallun cun roda d'aua. Era quel ei staus el raiun ed affar dils Venzins. Las canals eran montadas sin posts e menavan l'aua sur la via ora. Restau eisi mo las ruinas da crappa. La fracziun da

### *Mutschnengia*

cavegliada orasum la Tgamussa mava a moler ella val vischinonta, el Mulin veder; quei num local vegn aunc duvraus ozildi. La malaura

digl onn 1834 ha demoliu il baghetg staus il davos en possess da statalter Francestg Giger.

### *Curaglia*

1846 ha la vischnaunca concediu al rutinau Vigeli Pally (1820–1902) in sulom per construir ina resgia giu las Islas, la planiretta che schai silla riva seniastra dil Rein-miez. Il Vigeli che haveva in dun aparti per indrezs mechanics ha beinprest endrizzau en resgia e luvratori; mulin e fallun havev'el probabel installau gia enzacons onns avon. Giu da Mutschnengia ha el rabitschau las molas dil mulin devastau, ha cumprau ils plats resgia e fabricau sez igl ulteriur uorden. Per carschentar igl onz strebel Ual da Mutschnengia ha el menau neutier l'aua dil Dutg dalla Val da Crusch. Mo ferdaglia unviarns cun auas che sbuglievan mordio han sfurzau il Vigeli da dislocar ses indrezs novs oragiu Falandra (resp. Fuola u Flandra) silla costa dretga dil Rein-miez. La Val Plattas furneva cheu aua en abundonza. Molas novas ston neu; quellas vi da tschei maun eran forsa empau isadas u memia grevas per vegnir runadas neu sul Rein. Il factotum da Falandra va vi l'Uorscha per molas resch novas ed endrezza siu mulin pli bials che avon. Mo siu plascher dall'ovra finida ei cuorts; in grev accident da catscha igl onn 1877 fa el invalids per veta duronta.

Anno 1903 ha Sep Maria Capeder cumprau il mulin dil Vigeli e transportau el si Curaglia sut il hotel Scopi. Il dutg dil vischinadi ei immediat staus prompts da sebetter ellas palas dalla roda-lenn. Dumeni Bundi ha cuntinuau la tradiziun fagend scrinari-muliner. Entuorn ils 1950 ei succedi la disfatga definitiva.

Dadoragiu Curaglia, in tschancunet sur il davos caraun dil stradun che meina viers las aclas da Darein, stava da vegl il mulin dils Peders (quei fuss la versiun cuorta da Capeder). Il Rein dalla Val Plattas ha scuau naven quei mulin dall'Acla sut il settember 1868. Il muliner ha pudiu sesalvar il davos mument. Ina suletta mola ei vanzada sil toc ch'ins numna aunc oz Frust la Mola.

Buca lunsch sut Curaglia sper la punt dalla via nova dil Lucmagn han Sep Antoni Pally e Gion Maria Bundi eregiu anno 1877 ina resgia, in mulin ed el pign baghetg annex in fallun cun pella e torchel. Ina roda bastava pils treis indrezs. La construcziun da lenn deriva per part si dallas Islas, vul dir dalla resgia dil Vigeli Pally. L'aua dalla Val Plattas, menada neutier in dètg tschancun en canals da lenn, fageva ir la roda tut insurin.

Cura che resgiader e muliner Sep Antoni Pally (1846–1916) ei ius vi ella perpetnada ha siu feagl dil medem num artau ils baghetgs. Quei mat vegl (morts 1944) ei staus duront decennis in fideivel resgiader e muliner o la Resgia veglia. Cu el ha muncau, ein mistral Hermann e siu frar Walter Lutz, che havevan luvrau savens cugl aug Sep Antoni, daventai possessurs da resgia e mulin. E quei ein els aunc oz. Entochen els 1960 u pauc dapli han ins duvrau stediamein ils vegls cundrezs. Mo dapi lu ei l'explotaziun sistida damai ch'ei havess basignau grondas reparaturas per segirar ina buna funcziun.

Cheu ei il liug d'aschuntar il suandont. Anno 1918 havevan mistral Bundi ed ils frars Gion e Sep Antoni Lutz da Curaglia installau ina pintga ovra electrica che furneva forza e glisch ton als stabiliments numnai sco al vitg. – Sper ils Bearths e Pallys udess ad ina tiarza schlatta da muliners medelins ina menziun bein meritada: ils Albins, ton il Gion Valentin sco il Peder Librat naschi 1791 resp. 1818. Mo dad els san ins pauc.

### *Soliva*

Glieud pli passada sa aunc situar si resp. enta Mulins allas rivas dil Rein da Plattas las ruinas d'in baghetg cun rod'aulta. El steva leu da vegl en cumpignia d'in fallun en in'uclivetta svanida. Havend buc avunda aua per muentar ina roda sigl ault sulegliv da Soliva, stuevan ils purs descender cul graun giu Mulins e purtar la frina sin senda stentusa ensi. Igl Ual dalla Val Plattas havess aunc ditg giu peda e forza da far rudi-rudiala culla roda si Mulins; mo la malaura dil settember 1868 ha muentau la bova dil Blau; quella ed ulteriuras auas grondas ein dadas bravamein a dies al vegl mulin ed han fatg cul moler ina fin. Ins sa dir che Peder Lutz da Soliva seigi staus il davos muliner. Sblihi ein ils nums dils purs e dallas puras che han mulau cheu pli baul per las uclivas dils aults.

### *Pardatsch*


che ei stau a sias uras in uclaun habitau sur onn, possedeva senza dubi siu indrez da moler ella Val Mulina. Tgi che passa quella valletta po sedumandar cun tutta raschun sche Biscuolm, l'anteriura aultsituada ucliva, haveva in agen mulin u era dependenta d'in tal giu ella val.

## Mustér

### Segnas

nua che la cultura da garnezi e glin ei stada flurenta, ha giu inagada mulins e falluns da bien num. Sisum il vitg sper la via da Peisel habitava Giachen Muoth, maridau cun ina Franzosa, ina casa veglia cun mulin e fallun che mavan cun rod'aulta. Cheu aveva siu antenat Gion Giachen Bistgaun Muoth (1820–1892) gia fatg il muliner. In liung pluschein tschaffava l'aua in pulit toc sur la punt. Muliner Muoth mulava segal, dumiec e salin, pisava glin e struclava semglin. Igl unviern 1904/05 ei il baghetg barschaus giu. Casa, mulin e fallun ein vegni reconstrui. Suenter la mort da Giachen Muoth ha Benedetg Jacomet da Mompé-Tujetsch cumprau casa e cundrez. Siu fegl Benedetg ha fatg ir il menaschi entochen 1974. Lu eisi vegniu quiet cun rodas e molas e pisuns. Oz ei la «Casa Mulin» baghegiada ora per habitar.

In secund e fetg semegliont indrez da mulin e fallun era situaus ver 300 meters plinengiu. Ins scheva simplamein Mulin Huonder ed a siu patrun Gion Antoni da Mulin. Entuorn ils 1920, cura che Giusep Flepp ha acquistau la casa culs indrezs, ein mulin e fallun semidai en clavau e



Segnas. Casa-mulin da Giachen Muoth sper la via da Peisel cun in pistregn da vischins ual sut. Plinengiu il Mulin Huonder, medemamein cun pistregn. Dretg dils chischners, cascharia e fuorn dil vischinadi. Foto da 1910 circa, Orell Füssli, Turitg.

habitaziun. Cul temps ei Gion Deflorin-Maissen daventaus proprietari. Il zercladur 1982 ha il fiug deplorablamein destruiu igl entir baghetg. – Ha il muliner Gion Fidel Deragisch (1826) fatg ir in ulteriur mulin a Segnas ni il predecessur dil mulin Huonder? E tgei mulin ella Val resp. Ravera da Segnas gudeva Toni Stiefenhofer ils 1844/45?

La resgia veglia da Segnas, enconuschenta sut il num Resgia Desax, menada d'ina roda gronda occupava ina foppa vi davos l'actuala sechentera da carn. Daventada l'unfrenda d'in incendi ils 1974 eis ella vegnida remplazzada d'in cundrez modern, oz proprietad da Placi Flury. La cascharia che parteva in baghetg cul fuorn da vischins ha, aschilunsch ch'ins po seregurdar, buca giu roda d'aua. Dalla fravia veglia, stada aunc el 19avel tschentaner el plaunterren dalla sechentera Sialm, ein restai ils fastitgs d'in dutg che menava el vegl indrez.

### *Val da Cuoz*

Quater generaziuns dalla famiglia Schnoz, propi glied cun talent per industria e commerci, han menau ella Val da Cuoz sut Segnas ina fatschenta enconuschenta lunsch entuorn. Ella cumpigliava mulin e fallun, il luvratori da scrivaria ed entochen 1908 aunc ina scarsinaria leutier. Era la resgia muncava buc; ella pudess eventualmein datar dils 1864. Gliez onn ha la vischnaunca numnadamein lubiu a Gion Fidel Deragisch da baghegiar ina resgia si Segnas u Cuoz.

Quei spazi era buc il liug da cauma pil dutg dalla val. Il muliner Gion Giusep Schnoz (1825–1886) po aunc haver manischau el mulin, fallun, pella e torchel, baghetgs che sesanflavan pli da vegl in tschancunet plinensi che la scrivaria dad oz. Pader Karl Hager relata d'in fallun fetg primitiv, installaus all'entschatta dil 19avel tschentaner forsa. Pusseivel che Sep Mattias Monn da Buretsch ei staus da quei temps muliner ella Val da Cuoz.

Ins mava si respectiv giu Val da Cuoz per moler e fullar, mo era per far pinar uaffens ed iseglia. Ultra da quei vegneva era fatg cheu il ruder e vischler. Propi in center da sentupada e scomi da meinis per glied vegnida d'ensi e d'engiu. E las rodas aultas survevan incuntin la varionta mecanica. Anno 1918 ha meister Schnoz drizzau en ina turbina ed era provediu il vitg da Segnas cun forza electrica. La stad 1933 ha il fiug destruiu la gronda part dils baghetgs. Allora han ils frars Schnoz baghegiau lur resgia nova a Plaundadiras sper il stradun, ina fatschenta da lenna che flurescha ad in flurir. Sil sulom dalla veglia casa paterna ella Val da Cuoz

sesaulza ina casa da duas habitaziuns cun in luvratori che ha denton ca-tschau il mulin a cantun.

### *Funs*

Il Rein d'Acletta che s'unescha sur la lingia dalla viafier dalla Furca-Alpsu cugl Ual da Clavaniev ha furniu dapi tschentaners daried aua pils menaschis da Funs, Gonda e Raveras. La scheina da Funs cun s. Catrina, la zun venerada patruna dils muliners, ei in oreifer punct da partenza per visitar ils menaschis d'aua da Mustér. Il matg 1864 ha la vischnaunca luby a dr. Condrau da baghiar ina resgia si Funs sur la punt nova, pia leu nua che la via d'Acletta banduna oz il stradun.

Culs onns ei la resgia ida a divers possessurs ed affittaders: ils frars Vincenz da Sontget, major Francestg Antoni e capitani Felix, Sep Antoni Huonder ed auters. Ins resgiava per sesez e pils vischins dil contuorn. Ils 1890 circa ha Cristian Schmed († 1917) da Peisel – staus enzacons onns resgiader tiels Maissens a Rabiis – acquistau il baghetg ord ils mauns da Felix Vincenz e segirau la cuntinuitad per duas generaziuns. Giochen Schmed (naschius 1903) ha surpriu la resgia cun 17 onns e resgiau sco in carschiu, e quei per ina taxa d'aua da 10 francs per onn alla vischnaunca. Igl indrez era fetg resistent, reparaturas deva ei per aschidadir mai. La rod'aulta che haveva in diameter da treis meters ha tenu la dira entochen anno 1938, igl onn ch'ella ha renunziu en favur dall'electricitad. Da 1942 entochen 1965 ha Battesta Deragisch, feagl dil renomau resgiader e muliner claustral, fatg dalla primavera agl atun il resgiader tiels Schmeds. Ei tucava per temps da resgiar di e notg, cunzun cura ch'ins ha eregiu las punts piarsas per la nova Punt Russein. Battesta, igl enconuscent salter da cumin, era occupaus el negozi da lenna e segidava cul frar vegl che ha surviu alla vischnaunca sco bostger communal 1933–1971.

Vi la Resgia vegneva era fatg glatscha cura ch'igl ault digl unviern arrivava cun ferdaglia recenta. Els onns 1925/30 per exempel mava vieua Schmed sezza da mesanotg vi la Resgia, derscheva o aua sul glatsch per carschentar il sbugliadetsch. Ses feagls furnevan glatscha als hotels da Mustér ed al deposit dalla brassaria el tschaler dil hotel Rätia, anteriuramein possess da Gion Michel Flury a Sontget. La via nova d'Acletta e l'avertura dallas pendicularas han fatg fin cun resgia e regress dils Schmeds sper igl Ual da Funs. Cheu han las rivass dil Rein d'Acletta midau radicalmein aspect ed ambient.

### *Mustér-Gonda*


Silla riva dretga dil Rein d'Acletta resortevevan – avon la spazzada succedida 1978 – la resgia, il mulin e fallun dalla claustra. Tgi che ha legiu attentamein las paginas dedicadas al svilup dils indrezs da moler ella Cadi, sa ch'il niev mulin abbazial ha entschiet a funcziunar en quei liug cuort suenter ils 1750 e che sia famosa roda verticala ha muntau in grond progress per gliez temps. Mo era il baghetg niev ha giu da sbatter culs malarts dil destin. Las auas grondas dils 1762 ein vegnidas cun l'emprema scultschanada. Per far las reparaturas ha igl avat stuiu recuorer a meisters jasters.

Buca per pura casualitad ein mulin e resgia mitschai dil barschament da 1799. Quei ei stau il meret dil malizius muliner Sep Antoni Berther, bein en mongia culs Franzos che eran buca pauc dependents dil muliner e da sia frina. L'invasiun franzosa e sias consequenzas ein stadas diras per la claustra. Ei muncava persunal e resursas. Ils paders eran perquei bi leds da mintga entrada, buc il davos dil mudest profit ch'els targevan da lur mulin e resgia a Trun ed a Mustér. Ina notizia digl onn 1813 paleisa ch'els schavan a tscheins lur mulin e fallun on Gonda.

Il vegl complex claustral sper il Rein d'Acletta cumpigliava atgna-mein quater baghetgs: resgia e casa-mulin, clavau e fallun. Sut la lingia dalla viafier havevan ins fatg in uor per retener igl ual e menar in dètg tschallat aua sillas canals dalla resgia. Ina litografia dils anno 1840 muossa quei baghetg allungau che stauscha engiuviars viers la grunda dalla casa-mulin, lu la suletta casa crap da Gonda, ina construcziun massiva culs indrezs da moler el plaunterren e la mudesta avdonza (combra) dil muliner-resgiader suren. L'entrada menava silla vart dalla via en in spazius local cun dus mulins, da vart seniastra il mulin grond e da vart dretga il mulin pign. Ins saveva schar ir mo in u omisdus enina.

Anno 1884 – igl orsal steva sil treitetg e sin in quader el fallun – ha la casa-mulin survegniu ina nova e pli tschécca cumparsa. Il maletg ch'in fotograf ha fatg ils 10 d'uost 1891 fa ver la midada. La scheina da Gonda ei carschida. La resgia ha survegniu tetg dir; las rasenas da buoras ed aissas schain sut suostas. E la casa-mulin,alzada per in plaun resp. habitaziun, ha ina fatschada plascheivla. Flurs bein tarschinadas teidlan il sulegl sil parsiel dallas finiastras.

Resgia e mulin havevan ina rod'aulta da 4.50 resp. 3.50 meters diameter; quella dil mulin ei adina stada egl intern. Cul temps ei ina revisiun s'annunziada. Anno 1938 han motors electrici remplazzau la tracziun



Mustér-Gonda fa entuorn ils 1840 cumparsa da mudesta ucliva. Resgia, mulin e fallun sper la via vedra Sogn Gions–Sontga Gada. Tagl d'ina litografia da J. Jaccottet ord «Les bords du Rhin. Voyage pittoresque de sa source à son embouchure», Paris s.o. Collecziun grafica dil Museum retic, Cuera.

hidraulica. Al mulin suandavan clavau ed in fallun cun roda zanistrera (damaneivel 2 meters diameter) e tschun pisuns, dus per smaccar glin e treis per far o giutta.

Anno 1977/78 ha la claustra fatg on Gonda ina midada radicala che ha pretendiu considerablas investiziuns. Dalla veglia casa-mulin eisi re-

stau mo ils quater mirs integrai el niev baghetg da habitar. Il vegl garter da fier battiu staus sur l'entrada dil mulin ornescha uss il culmar dalla fatschada che dat encunter sera. – Igl areal dalla resgia ei semidaus en in curtgin, il fallun ei daventaus garascha. Il president da vischnaunca ha spindrau la roda-fallun ed autra tocca valeivla dalla decadenza segira.

Aschia semidan ils edificis sco ils temps e la glieud. Mo paucs vischins pon s'imaginar ch'igl ei buc adina stau lev pils locataris da tractar culs zun differents paders statalters e viceversa. E tgi seregorda aunc dil salter da cumin Leci Ursicin Monn (1833–1920), staus duront decennis muliner e resgiader claustral, ni da Placi Desax, siu successur ils onns dal- l'emprema uiara?

En pli frestga memoria semantegn la famiglia Deragisch che ha luvrau onns ora a Gonda ton per la claustra sco pil vischinadi: Sep Antoni Deragisch, siu feagl Johann (1891–1977) cul frar ledi Josef ed ils fegls da Johann, en special Felix ch'ei staus il pli davos muliner e resgiader (entochen ca. 1975/76). Ins sa resdar ch'il Johann Deragisch, in famus catschadur, pescadur e trochist, senzegiava aunc cun 70 onns dallas pausas el stan da tir da Fontanivas per dar ballapei culla squadra bizara da fegls e



Ils indrezs dalla Claustra on Gonda: la casa-mulin cun la resgia davostier, il clavuau, il fallun cun la roda zanistrera e la scarsinaria-scrinaria Desax. Carta postala dils anno 1930 circa.

biadis ed amitgs tiradurs. Ei descha da francar en quest liug il num da sia consorta, l'aspra e nunstunclenteivla Luisia († 1975); ella dumignava buca mo la gronda truscha en mulin e fallun, mobein preparava il gras muntaniala e restigiava bia auter cura che ses umens mavan cun pissiun a catscha aulta e bassa.

Il mulin dalla claustra fuva denton mo igl emprem rin ella fila dils variunts cundrezs hydraulics situai denter dils straduns dall'Alpsu e dil Lucmagn. Tgei grondiusa scuvretga sch'ins havess saviu registrar avon tschien onns en tun e maletg il scadenar e barhar allas rivas dil Rein da Acletta! Quei havess dau in film documentar da nui, propi ina documentaziun che pudess entusiasmar ils admiraturs da tradiziuns popularas, ils hosps da vacanzas e forsa schizun enqual indigen (!). Tgei deletg da contemplar co l'aua seschlueta tras dutgs e canals e croda tschallatond els cups u palas dallas rodas! E con captivont ei fuss da tedlar ils umens che dattan agra e resgian, che marclan e dolan, ni da cumpignar las masseras che molan e fuolan la materia necessaria per viver e sevestgir!

Gest sur la punt da Gonda, la punt dalla via vedra che mava viers S. Gada, in pass sut il stellischein dil fallun claustral steva il menaschi da Placi Desax (morts 1954 cun 93 onns). Quei 'industrial' dil vitg possedeva leu scrinaria, scarsinaria e tenscharia sut il medem tetg. Pli da vegl ei la fatschenta stada els mauns da Gislars, forsa parents cun quels da Sedrun-Salins. Quella scarsinaria mecanica sto esser stada ina gronda novaziun entuorn ils 1850. Il famus schumber cun guottas da fier per sluccar la launa avon che filar ha remplazzau ils scarsins generalmein en diever avon. Ver tschien onns ha la rod'aulta tratg ils grevs cilindres (entochen 1947); dapi lu paussa ella bein schit el zuppau laschond la dira fadigia alla forza electrica.

Placi Desax era scrinari da professiun e s'empatschava silpli en cass da reparaturas dalla scarsinaria, nua che sia dunna ed in pèr gidontras devan damogn cul scarsinar e tenscher. Anno 1945 han il feagl Battesta e sia dunna Claudia, naschida Hossmann, ughegiu da surpender la scarsinaria. Aunc sco vieua ed els 80 ha la scarsinunza da Gonda tenuu la dira e pudiu transmitter al beadi Roland de Sax buca mò las cumprovadas maschinas, mobein era il dun e tschaffen da tarschinar launas. E pilver! Il giuven vegnius si dalla Bassa ei cun cor e maun vid sia causa creond colurs admirablas cun scorsas e feglia e jarvas.

Las industrias sut la Punt da Gonda stavan cun ina suletta excepziun silla riva seniastra dil Rein d'Acletta. Parallelmein cun quella flessegiava

in dètg dutg mulinanc, en canals u bischels gest sco ei fageva da basegns. Sut la Punt da Gonda, pli precis fuss ei da dir giun Ruosna, havevan Toni Manetsch e pli tard ses fegls Hans e Lucas in variont complex: resgia e scrinaria, mulin e fallun. Las duas u forsa treis rodas d'aua han calau da girar ils anno 1905. Quei onn ha Toni Manetsch (1864–1916), in mi-stergner plein ideas e gronda iniziativa leutier, installau ina turbina che ha furniu forza electrica al vitg da Mustér ed allas maschinas dalla Stampa Romontscha. La lingia d'aua ei aunc restada per decennis ed era il lennam emplunaus u rasenaus entuorn entuorn, gie schizun da tschei maun digl ual.

Il mulin sesanflava en sia casa, giu suten. L'aua entrava en bischels, ditg e liung per la roda, silsunter per muentar la turbina. Il fallun ha stuiu far plaz sil pli tard anno 1905 als indrezs dalla forza electrica. Quei onn ha Curdin Flepp numnadamein vendiu siu sulom dil fallun a Toni Manetsch, al qual igl ei restau mo in bien decenni per sededicar a sias occupaziuns tecnicas. 1949 vendan ils frars Hans e Lucas la resgia a gerau Placi Desax junior. Ella ei aunc oz en funcziun silla Cuppa ella scrinaria dils frars Johann e Victor Maissen. El medem temps vegn era la turbina demontada ed il mulin electrificaus. El stat eri 1976 – Lucas ha serrau la retscha dils muliners – ed anfla allura in niev suttetg a Sumvitg ella Val Mulinaun. La «Casa fallun» vegli regurdar il viandont che passa si e giu allas modas primitivas da luvrar ed allas novaziuns fatgas dapi l'entschatta da nies tschentaner.

Pauc plinengiu secattava la schinumnada resgia dils Frys. Battesta Fry (1856–1950) ha mess si leu anno 1900 per dr. Conradin Hess ina resgia cun scrinaria vitier e priu si tut per tscheins. La roda gronda da palas, bunamein quater meters aulta, ha prestau buns survetschs entochen alla entschatta dalla secunda uiara mundiala. Giusep Fry (1889) ei passaus anno 1919 els fastitgs da siu bab ed ha teniu stendiu per quater decennis. El ha raquintau ch'el resgiavi ils emprems onns per sis centims il meter current e stuevi dar giu la mesadad e tut ils curdems leutier agl affittant dr. Hess. Giusep Beeli da Medel ha cumprau quella resgia ils 1959.

### *Mustér-Raveras*

Sur la Punt dil Lucmagn stavan dus indrezs: il luvratori da ruder da Placi Rudolf (pli enconuschents sco Placi «gerber») e la scrinaria da Battesta Werth, transformada pli tard en in deposit da bubrondas. Omisdus menaschis havevan aunc tschécca muntada avon 30, 40 onns; els duvra-



Mustér-Raveras e la claustra. Davontier il niev stradun dil Lucmagn, las canals ed il mulin da Giachen Venzin. Tagl dalla xilografia «Dissentis» da T. von Eckenbrecher, cumparida per l'emprema gada en Woldemar Kaden, Das Schweizerland, Stuttgart 1875-77.

van ina roda d'aua da cuminonza. Ton sco nuot dat pli perdetga da lur existenza d'inagada.

Ei vonza aunc il quartier sut la Punt da Raveras. In tunnel baghegiaus parallelmein cugl ual menava la mulinanca sutora e surdava ella allas liungas canals dil mulin e fallun da Giachen Venzin-Maissen situaus sut la scrinaria da Placi Flepp. Umens naschi entuorn ils 1900 seregordan aunc fetg bein ch'els mavan da buob a pei blut da quella misteriusa galleria enasi entochen si tier la roda d'aua communabla dil Rudolf e Werth. La tradiziun dils Venzins para d'esser dètg veglia. Giachen Tumaisch (1822–1858) ei mo in ella retscha da lur era mulinera sut la punt. La generaziun precedenta ei representada da Bistgaun Andriuet naschius 1794. En nies tschentaner han Giachen Venzin, sia consorta Onna Maria e lur 11 affons, oravontut il Bernard (1904–1983), dau veta e valeta al mulin da Raveras. Il fallun ha stuiu ceder gia ils anno 30. Igl onn 1980 han ins renovau la casa, ed allura ei era il mulin vegnius dismiss. Sut il mulin Venzin era la mazlaria Gadola. Guglielm pign, il bab digl enconuschent scribing popular dil medem num, duvrava ina roda zanistrera per alzar si tiers gronds e per trer ina maschina da manizzar carn.

Giudem Raveras, cuort avon ch'il dutg dallas fatschentas menziunadas sbucchi el vau digl ual, steva ina semplra roda d'aua sut ina suosta. Da cheu naven tunscheva ina suga da varga 70 meters si ella fravia veglia da Ernst e fegl Fidel Huonder. Cun agid d'ina transmissiun targeva quei cabel il fol ed ina maschina da furar metal. Quei zun patent sistem era semeglionts agl indrez dalla fravia d'Arnold Giger a Schnaus. Ils 1924/25 ei succedi la midada dalla roda d'aua al motor, mo quel ha buca luvrau biars onns. Entuorn ils 1930 gia ha Gion Lutz aquistau il baghetg sil cunfin Raveras/Vitg e transformau el en ina habitaziun. Il giuven fravi Battista Bundi ha cumprau igl inventari e priu si il luvratori per cuort temps, vul dir entochen ch'el ha giu baghegiau igl onn 1932 sia fravia nova a Catins sper la via dil Lucmagn.

La riva dretga oragiu Raveras ei stada habitada el tschentaner vargau e forsa gia avon. Catan Huonder (1845–1926) duei haver baghegiau avon tschien onns circa ina scrinaria visavi il mulin Venzin. Quella u in semegliont indrez haveva roda d'aua. La vischnaunca ha protestau e fatg spazzar il baghetg che scrinari e catschadur Huonder haveva sco ei para construui senza lubientscha. Mo quel ha priu in rutinau advocat ed ei se defendius cun bravura gudignond in process che ha custau per lezs onns ina considerabla summa alla cassa communal.

## *Mustér-Vitg*

Igl ei uras da schar serpegiar igl ual vinavon, staunchels ch'el ei dad ir per dutgs e sur rodas e probabel bi leds da prest puder embratschar siu cumpogn il Rein grond oragiu Brulf. Mo dils indrezs mechanics da Mustér eisi aunc per bia buca detg tut. Gion Antoni Rudolf (1789–1879) ei staus gerber sco era siu fegl Gion Gieri Fidel (1821–1907). In dils falluns da Gonda u Raveras era per franc stgis da manizzar las scorsas per la gerba (forsa buca la suletta) plazzada sper l'actuala Stampa Romontscha. Leu pudevan ins dil reminent udir bein il batter e marclar dil fravi el local che ha dau suttetg alla stampa veglia, quella da 1857, e pli tard alla «Dépendance» dil hotel dalla Cruna. Dus umens silmeins veglien en quest liug regurdar alla razza fermezia dils fravis da fier e d'iom, da crotschas e da cavals: Placi Antoni Flepp da Raveras (1811–1855) pil temps vegl e Battesta Bundi-Zazzi da Cattins (1896–1982) per la midada dalla tradiziun alla tecnica.

Ei vala la peina da sefermar aunc in cuort mument el Vitg. Il fevrer 1868 ein in tozzel purs sedecidi da purtar il latg en ina cascharia communal. La claustra, sezza il grond pursanavel, ha mess a disposiziun il baghetg, la panaglia e schizun igl agen signun. Sto esser che l'innovaziun ha prest pigliau ragischs; pertgei in onn pli tard han ins giavischau che la claustra installeschi in indrez da trer panaglia cun l'aua sincerond ch'ella hagi en quei cass ni da furnir lenna ni da pagar pustretsch. Ei vegneva caschau da calonda mars entochen calonda matg, onns tardivs ina u duas jamnas pli ditg. Professer Placi Condrau, tut incantaus dil progress economic da Vitg ed uclauns, scriva en ina Gasetta romontscha da quei temps che Mustér possedeve 8 muliners, 5 fravis, 3 cuntschacurom, 4 colorists (ferbers), 7 signuns e secapescha aunc biars auters mistergners.

Il lectur po forsa sedumandar sche Mumpé Medel possedeve pli baul agen mulin e resgia. Ils cundrezs novs dateschan da 1934 e van cun current electric. Avon stuevan ils purs dall'ucliva bardigliar graun e glin a Mustér, da preferenza el mulin dalla claustra sper la via vedra. Mumpé haveva strebel aua pil tenercasa nundir per in mulin. Las femnas havevan bia gadas buc autras letgas che dad ir da Ragisch enagiu e tochen Rein per lavar resti, in stuffi toccun per descender e per turnar aunc bia mender.


### *Cavardiras e Caprau*

mavan a moler e fullar a Mulinets sur la via vedra sin la pastira denter ils dus vischinadis. In mulin e fallun ein i entochen 1912. Ei era plirs baghetgs. In u l'auter ein stai proprietad da Gion Francestg e Placi Monn. Quei era mistergners cun dètg vastas enconuschientschas. Els capevan era da luvrar ora lenn, cunzun il Placi vischler. Da temps en temps mavan els cun cargas bellezza rauba da lenn dalla Val Medel enasi, sul Lucmagn e Munt Schiember per vender lur mercanzia giu ellas vals ambrosianas. Anno 12 ha Toni Manetsch, il rufinau tecnicer ch'il lectur enconuscha dils indrezs da Mustér-Gonda, cumprau il mulin dils Monns ora Mulinets e leutier forsa era il fallun respectiv siu sulom. El ha demontau e schubergiau la tocca sperond da furnir ella per in'exposiziun. Ins astga supponer ch'ei settractava cheu da mulins bass, pia d'indrezs cun roda horizontala alla moda veglia. Tut surura ein ils plans dil Manetsch vegni tschuncanai. E las tegiettas da Mulinets, sbluttadas e sposadas sil peter pis, han buca giu autras letgas che smarschir. Ils descendents da Toni Manetsch san aunc relatar ch'el hagi allura cediù ils suloms o Mulinets alla vischnaunca e survegniu da quella encomi silla riva dretga on Gonda la medema mesira pastira numnada dapi lu «vi l'America».

### *Disla*

A Sum Disla dado la caplutta da s. Leci nescha in dutg. Quella fontauna dils Huns respectiv fontauna freida da s. Leci ei senza dubi stada da gronda muntada per plazzar l'emprema culegna ella foppa tumpriva. El plaunterren dalla casa sper il sanctuari (stau casa Caduff, oz en possess da Walter Maissen) possedeve la claustra ina fravia cun roda d'aua pil fol. Igl indrez regorda buca pauc als cavals da sauma ed als vitturins dalla via veglia sursilvana. La fravia vegn menziunada anno 1801. Ei pudess settractar dil vegl indrez. 1813 dat la claustra a tscheins sia fravia nova giu Disla. Entuorn ils 1820 regia cheu il fravi tiroles Josef Schatz che ha fabricau pliras sprezzas da fiug per las vischnauncas dalla Cadi. Forsa ein Placi Fidel Bigliel (1790–1856) e Pieder Antoni Valier (1815–1884) stai ses successurs.

Disla haveva avon 150 onns bia dapli terren e habitonts che ozildi. Mulins, fallun ed auters indrezs survevan als agens basegns. Las auas grondas da 1834 e da 1868 han raffau naven bia funs fritgeivel e clavaus situai giu el plaun sper il Rein. Protocols da hipotecas muossan che Leci



Rod'aulta dalla resgia da Disla. Foto d' Anita Bisquolm, Mustér-Madernal.

Steri possedeva già il 1795 un mulino a Disla e che sei discendenti avevano l'entier in fallimento il 1838/42. L'impresa menzionata più concretamente merita il mulino pign. El ei staus in vegl mulin da dretgs, els mauns dallas famiglias Manetsch, Berther, Bundi ed autras. Il dutg sgurghigliava dils praus giadora viers Disla Sut, prendeva in pulit catsch e mava sut il mulin en stuschond las palas dalla roda zanistrera. Las molas pusan aunc el baghetg scardaliu che stat cheu tut paupers e schenaus.

Sut il mulin pign muentava ina roda gronda la resgia da Lucas Monn. El plaunterren annex avevano ils vischins da Disla endrizzau in fallimento da dretgs cun pella e roda zanistrera. Il torchel d'ielì semglin stava ella casa da scola ed era anno 1916 en tutta cass stgìs da satisfar als bagens dils vischins. Il mulin ault sut il rieven ei staus inagada en possess dallas famiglias Manetsch e Placi Bigliel. Pli tard eis el ius tras ierta a Pieder Beer; siu fegl Giusep, il davos muliner da Disla, po haver mulau entochen 1955; allora eis el setratgs ella Bassa. Il cundrez ei restaus pulit intact, mo la roda ruissa dils onns ei buca pli. Ella casa-mulin habitescha glied d'ordeifer. Ed il dutg, tscheu e leu mess sut tiara, rocla da quei trestet dalla plaunca giu e sepiarda el letg dil Rein.

Ual sut il fallun, denton silla riva dretga dil dutg, ei aunc semantennida la casetta che ha dau albiert alla renomada ferbra. Pader Placi a Spescha ha annunziàu l'installaziun da quei indrez en sias notizias d'anno 1815. Gliez onn ha Giachen Antoni Berther-Caduff, oriunds da Danis, daveras aviert la tenscharia che ha rendiu duront quater generaziuns buns survetschs alla populaziun dalla Cadi e d'ordeifer. Francestg Berther-Sialm (1799-1870), siu feagl Conradin Giusep Berther-Manetsch (1825-1881) ed il biadi Aluis Francestg (1864-1945) e sia consorta Maria Tresa Monn han fatg tutta honur al ferber fundatur.

La tenscharia, atgnamein pli enconuschenta sut il num «ferba da Disla», era endrizzata el plaunterren dalla casetta allegada. Suren habitavan ils tenschateilas da tschels onns, silmeins entochen 1846, igl onn ch'ils Berthers han baghegiàu la casa dubla el prau encunter sera. La ferbra haveva ina roda d'aua zanistrera ch'ins duvrava per diversas lavurs. Eran resgia e fallun sisura en moviment, haveva il dutg breigias da prender il catsch necessari per far ir la roda dalla tenscharia. Duront periodas schetgas tschessava la fontauna da s. Leci. Mo ils Berthers seschavan nuota metter en perfetg. Els mavan silla Val Sogn Placi dadens Faltscharidas, bettevan il torrent d'ina vart, e pren mira, dus dis pli tard haveva Disla aua detgavunda.

Ils ferbers havevan viaden egl atun ed unviern pil solit lavur da strusch puder dar damogn. Giu da Mustér vegneva la buobanaglia magari suenter scola cun zuolas teila sin scarsola. A pei e sin menadiras arrivavanargas launa, carpun e cadisch per schar colurar. La primavera purtavan las tissunzas buordis teilas tessidas in unviern ora. Ils Berthers devan colur tenor giavisch e talien, e quei per in prezzi mudest. Mintga bategl era marcaus cun la noda-casa dil possessur; ils ferbers enconuschavan segns e clients ordadora.

Ils davos tenschiders, il Luis Berther «ferber» e Gion Antoni Levy (1873-1952), han teniu la dira entochen 1943; mo lu ei la ferbra ida en. Ina part dils indrezs ed utensils da fullar e colurar han priu la via per Basilea nua ch'els ruaussan el Museum d'etnografia e tradiziuns popularas. Empau tocca po aunc esser starschada tscheu u leu. Tgi che s'interessescha per la sort e funcziun dalla ferbaria da Disla, legi la lavur da patenta che la scolasta Anita Bisquolm da Madernal ha dedicau a quella interpresa svanida.

Vonzei ein ils locals dalla ferbra semidai en in luvratori da crappa scalegl e serpentin. Curdin Berther, feagl dil davos ferber, Gion Antoni

Levy cun siu fegl Giusep ed auters han svilupppau in'industria che ha flu-  
riu buca mal in tschuppel onns.

### *Madernal*

dadens la siara da Travaulta, possedeva o la Val Russein – o Mulin  
sco ils cussadents dall'ucliva dian aunc oz – in sempel indrez dil qual mo  
las ruinas ein pli veseivlas. In cuort pluschein menava l'aua sutora e  
muentava la roda da palas zanistrera. Ch'il mulinet da Madernal ei era  
staus fetg d'engrau als purs da Perdomat, basegna negina explicaziun.  
Placi a Spescha sa resdar da duas resgias agl ur digl Ual da Barcuns,  
aschia numna il zun allert pader ils torrents da Cavrein e Russein reuni.  
L'ina era en Barcuns-Dadens, l'otra stava dado Madernal. Las auas  
grondas da 1764 han demoliu quella resgia e la magnifica punt crap sin  
l'aua che sparta la Sur- e la Sutsassiala.

(Cuntuaziun suonda)